

A Ny soa azo avy amin'ny finoana:

❖ Fampiononana sy fiderana ary filaminana (Kolosiana 2:1-5)

- Na dia tsy mahafantatra manokana ny fiangonana tany Kolosia aza i Paoly, dia fantany fa tandindonin'ny fampianaran-diso izy (Kol. 2:1, 4).
- Noho izany antony izany, no nanoratany ho azy ireo ka nisy tanjona telo mazava tsara izay hanampy azy ireo hatrika izany loza izany (Kol2:2): mba hampaherezina ny fony; ary ho tafaray amin'ny fitiavana; mba hananany ny haren'ny fahatokiana be avy amin'ny fahazavan-tsaina; mba ho fantany ny zava-miaina izay an'Andriamanitra, dia i Kristy.
- Alohan'ny hanambarana ireo fampianaran-diso, dia misy teny fiderana roa sosona ho an'ny Kolosiana: milamina izy ireo; ary mijoro mafy amin'ny finoana (Kol. 2:5).
- Ny “filaminana” resahin'i Paoly eto dia ny filaminana eo amin'ny fanompoam-pivavahana sy amin'ny asa samihafa ataon'ny fiangonana. Tsy maintsy nisy fitarihana sy fizarana andraikitra tao; ka tsy maintsy ho natao amin'ny fomba mendrika avokoa ny asa rehetra; sy ny sisa. Hiteraka fanambarana tsara kokoa ny filazantsara izany sady hiaro azy ireo amin'ny fahadisoana sasany.

❖ Mamaka ao amin'i Kristy (Kolosiana 2:6-8)

- Mandray famonjena isika rehefa mandray Olona iray, fa tsy ny fitambarana fampianarana fotsiny (Kol. 2:6). Tena ilaina anefa ireo. Mananatra antsika i Paoly handeha ao amin'i Kristy “araka izay efa nampianarana anareo” (Kol. 2:7b).
- Rehefa mandeha ao amin'i Jesosy isika dia mamaka ao Aminy. Isika dia “nambolen'i Jehovah ho fampisehoam-boninahitra” (Isaia 61:3). “Hazo” mifikitra amin'i Jesosy sy ny fampianarany isika (Salamo 1:3).
- Ankehitriny, misy karazany roa ny fampianarana:
 - (1) *Araka an'i Kristy sy ny fampianarany voarakitra ao amin'ny Baiboly*: Tafatoetra amin'ny finoana isika ary mazoto amin'ny fisaorana (Kol. 2:7)
 - (2) *Araka ny filozofia sy ny famitahana foana, araka ny fomban-drazana*: Voafitaka sy voatsara ary tsy mahazo ny loka isika (Kol. 2:8, 16, 18)

❖ Ny sora-tanan'ny didy nofantsihina teo amin'ny hazo fijaliana (Kolosiana 2:9-15)

- Nanamafy ny faneken'ny tamin'Andriamanitra tamin'ny alalan'ny famorana i Abrahamana (Gen. 17:11). Manamafy ny fanekena amin'i Jesosy amin'ny alalan'ny batisa, izay “ny famoran'i Kristy” isika (Kol. 2:11-12). Midika izany fa tsy ilaina intsony ny famorana ara-nofo.
- Rehefa avy nanazava izany hevitra izany i Paoly, dia niresaka momba ny asan'i Jesosy teo amin'ny hazo fijaliana. Inona no notanterahin'i Jesosy?
 - (1) Novelominy isika, navelany ny fahotantsika (Kol. 2:13).
 - (2) Nofonanany ny fiampangana ny trosantsika araky ny lalàna, izay miampangana antsika (Kol. 2:14).
 - (3) Nandresy ny fanapahana sy ny fahefan'ny ratsy lzy (Kol. 2:15)
- Ny Efesiana 2:14-15 dia manazava fa ireo “lalàna” na “didy” izay nanohitra antsika dia ny lalàna seremoniely, izay mandrafitra rindrina nampisaraka ny Jiosy sy ny Jentilisa.
- Noho izany antony izany no tsy ilantsika intsony ny fitandremana ireo lalàna seremoniely ao amin'ny Testamenta Taloha, izay nanana ny fahatanterahan'izy ireo sy nifarana tao amin'i Kristy.

B Olana manozongozona ny finoana:

❖ Andro firavoravoana, voaloham-bolana, ny sabata (Kolosiana 2:16-19)

- Ankoatra ny famorana, dia nisy teboka hafa koa nampiavaka ny Jiosy sy ny Jentilisa: ny fombafomba ara-pivavahana sy andro firavoravoana.
- Efa nataon'i Paoly mazava tsara ny anjara asan'ny famorana. Izao indray i Paoly dia manondro ny hevitra ny fanafoanana ny “sora-tànana” (ireo lalàna seremoniely), amin'ny fampiasana ny voambolana hoe “avela”: tsy zavatra tsy maintsy atao intsony ho amin'ny famonjena antsika ny fitandremana ny fombafomba sy ny andro firavoravoana, izay tanteraka ao amin'i Jesosy tamin'ny nahafatesany teo amin'ny hazo fijaliana. (Mat. 27:51; Kol. 2:16).
- Toa nanonona ny Hosea 2:11 i Paoly hamintinana amin'ny fehezanteny iray ny fomba ara-pivavahana manontolo tao amin'ny Fitoerana Masina. Midika izany fa ny Sabata voalaza eto dia ny Sabata fito seremoniely (tandremana na andro inona na inona amin'ny herinandro no ianjerany), fa tsy ilay Sabata isan-kerinandro (izay anisan'ny lalàna moraly, natao sy ampiharina ho an'ny rehetra, na Jiosy na Jentilisa).

❖ Didin'olombelona (Kolosiana 2:20-23)

- Ireo mpampianatra sandoka, izay resahin'i Paoly im-betsaka ao amin'ny taratasiny, dia tsy iza fa ny Jiosy izay nampianatra ny ilàna ny fanarahana ny lalàna Jiosy hahazoana famonjena (Asa 15:1, 5). Anisan'ireny lalàna ireny koa ny fitsipika maro novolavolain'ny raby.
- Andeha isika hanaraka ny fihevitr'i Paoly. Tamin'ny batisa dia maty tamin'ny “abidim-pampianaran'izao tontolo izao” isika ary velona ho an'i Kristy. Raha mbola manahy isika, ohatra, ny amin'ny fahalotoana araky

ny fombafomba, dia mbola miaina eto amin'izao tontolo izao isika, ary manahy ny amin'ny zavatra izay ho levona noho fanaovana ihany (Kol. 2:20-22).

- Nohazavain'i Paoly anefa fa, ho an'ny Jiosy zatra ireny fombafomba ireny, dia manana soatoavina ara-moraly ho an'ny tenany manokana izy ireny, na dia tsy ilaina amin'ny fanovana ny fo aza (Kol. 2:23).
- Raha fehezina, dia tsy maintsy tarihin'ny fampianarana voarakitra ao amin'ny Soratra Masina isika—avy amin'ny tsindrimandrin'Andriamanitra—fa tsy amin'ny filozofian'olombelona na ny fisainany.